

मार्निंग डोगरी न्यूज़ बुलेटिन, समें. **09-20** Hrs

<><><><><><>

Headlines

- प्रधानमंत्री नरेन्द्र मोदी होर अज्ज कटरा थमां 46 ज्हार करोड़ रुपें दिएं केई विकास परियोजनाएं दा शुभारंभ करडन। मोदी होर श्रीनगर लेई बंदे भारत रेल सेवा गी झंडी दस्सियै रवाना करोआडन। प्रधानमंत्री हुं'दे दौरे लेई सुरक्षा दे निगगर बंदोबस्त कीते गोदे न।
- लेफ्टिनेंट गवर्नर मनोज सिन्हा होरें कटरा च प्रधानमंत्री हुंदी जनसभा लेई तैयारिएं दा जायजा लैता। उ'नें आखेआ जे प्रधानमंत्री हुं'दे आसेआ उधमपुर—श्रीनगर—बारामूला रेल लिंक परियोजना दा अज्ज कीता जा'रदा लोकार्पण, जम्मू—कश्मीर लेई इक ऐतिहासिक उपलब्धि ऐ।
- उपमुख्यमंत्री सुरिंदर चौधरी होरें त्रै बारी दी राश्ट्री वुशु चैंपियन गीनाक्षी हुं'दे कन्नै मलाटी करियै उ'दी शानदार उपलब्धिएं दी सराहना कीती।
- जल शक्ति मंत्री जावेद अहमद राणा होरें जम्मू—कश्मीर च जनजातीय इलाकें दे पूरे—पराते विकास लेई जनजातियें सरबंधी उप—योजना दी समीक्षा कीती।
- भारती फौजै, औंदी श्री अमरनाथ जी दी जात्तरा गी सुरक्षित ते बवस्थित ढंग्गै सिर करोआना जकीनी बनाने लेई आपरेशन शिवा नांS दा अभियान रम्भेआ ऐ।

<><><><><><>

PM JK Visit

प्रधानमंत्री नरेन्द्र मोदी होर अज्ज श्री माता वैष्णो देवी जी दे आधार शिविर कटरा थमां 46 ज्हार करोड़ रुपें दिएं केई सारी विकास परियोजनाएं दा शुभारंभ करडन। प्रधानमंत्री होर कश्मीर घाटी लेई सिद्दी रेल सेवा गी अज्ज झंडी दस्सियै रवाना करोआडन। इस सरबंधै च पेश ऐ साढ़ी एह् खास रिपोर्ट

<><><><><><>

LG Katra Visit

लेफ्टिनेंट गवर्नर मनोज सिन्हा होरें उधमपुर—श्रीनगर—बारामूला रेल लिंक परियोजना दे अज्ज कीते जा'रदे लोर्कापण गी जम्मू—कश्मीर लेई इक ऐतिहासिक उपलब्धि करार दिंदे होई आखेआ ऐ जे केन्द्र शासित प्रदेश अज्ज सदा थमां मता मजबूत ते खुशहाल ऐ ते एह प्रधानमंत्री नरेन्द्र मोदी हुं'दी अगुवाई तैह्त्त अज्ज विकास—बाददे दिआं नभियां उंचाइयां हासल करा'रदा ऐ। एलजी होरें कटरा च प्रधानमंत्री नरेन्द्र मोदी हुं'दी अज्ज लोआई जाने आहली जनसभा कोला पैहले कल उत्थुं दा दौरा लाइयै प्रबंधं दा निरीक्षण कीता। एलजी होरें कार्यक्रम दे बवस्थित आयोजन लेई तैयारिएं दी समीक्षा कीती ते अधिकारिएं गी एह निर्देश दित्ता जे ओह बक्ख—बक्ख मैह्कमें बश्कार तालमेल जकीनी बनान।

<><><><><><>

PM-Udh Security

प्रधानमंत्री नरेन्द्र मोदी हुं'दे दौरे शा पैहले अज्ज उधमपुर शैहरा ते एहदे आले—दोआले दे इलाकें च सुरक्षा बवस्था निगगर करी दित्ती गेई ऐ। रेलवे स्टेशन तोहड़ी जाने आहली सिड़कै पर बड़ी बद्ध गिनतरी च पुलसकर्मिएं दी तैनाती कीती गेदी ऐ। रेलवे स्टेशन पर औने—जाने आहले सब्भनें लोकें दी खरी चाल्ली जांच कीती जा'रदी ऐ ते गडिडएं पर बी नेड़मी तक्क रक्खी जा'रदी ऐ।

<><><><><><>

DyCM Wushu Player

उपमुख्यमंत्री सुरिंदर चौधरी होरें जंदी 26 थमां 31 मई बश्कार आयोजित राश्ट्री वुशु प्रतियोगिता च सुन्ने दा तगमा जित्तिथै जम्मू—कश्मीर दा मान बधाने आहली युवा उभरदी वुशु चैंपियन गीनाक्षी मेहरा हुं'दे कन्नै कल मलाटी कीती। ध्यानजोग ऐ जे 10एं ब'रें दी लौहकी ज्जेई उम्री च गै गीनाक्षी होरें गुजरात च खेलो इंडिया वीमेन लीग नेशनल्स ते पंजाब दे तरनतारन च होई दी राश्ट्री वुशु प्रतियोगिता च सुन्ने दे तगमे जित्ती लैते दे न। उपमुख्यमंत्री होरें गीनाक्षी ते उं'दे माता—पिता होरें'गी ऐकड़ी शानदार उपलब्धिएं लेई मुबारकबाद दित्ती ते उ'नेंगी हर मुमकन सैह्योग दा जकीन दोआंदे होई आखेआ जे सरकार जूनियर ते सब—जूनियर महिला खड्गारिएं अंदर खेड्ढ संस्कृति गी बढ़ावा देने लेई वचनबद्ध ऐ।

<><><><><><>

Special Feature

भारत नै सेवा सुशासन ते गरीब कल्याण दे सिद्धांतें थमां प्रेरित होइयै इक दहाके च टकोहदा बदलाव कीता ऐ। आकाशवाणी समाचार अपने श्रोताएं लेई पिछले 11 बरें च प्रमुख क्षेत्रें च सरकार दी उपलब्धिएं नी केन्द्रित इक विशेष श्रृंखला लेइयै आया ऐ। अज्ज भारत दी सगोसार संस्कृति ते विरासत दे संरक्षण पर ध्यान केन्द्रित कीता जा'रदा ऐ। पिछले इक दहाके थमां सरकार आस्सेआ केई ऐसे अभियान चलाए गे न जिंदे च भारत दी सगोसार संस्कृति ते विरासत दी राखी करने पर ध्यान केन्द्रित कीता गेआ। इंदे चा गै इ ऐ "आजादी का बमूत महोत्सव" जेह्दे च देसै नै आजादी दे 75 बरे पूरे होने दा जश्न मनाया ते इस दरान भारत दिएं उपलब्धिएं गी उजागर कीता गेआ। इसै चाल्ली "एक भारत—श्रेष्ठ भारत" पैहलकदमी तैह्त् केई सांस्कृतिक कार्यक्रमें दा आयोजन कीता गेआ जियां जे काशी—तमिल संगमम ते ऐतिहासक महाकुंभ मेला 2025 जेह्दे च 66 करोड़ शा मते श्रद्धालु किट्ठे होइयै अनेकता च एकता जश्न मनाया। एह्दे अलावा 2024 च 23 करोड़ शा मते लोकें योग कार्यक्रम च हिस्सा लेइयै नमें रिकार्ड बनाए ते इसी वैश्विक सतह पर चलाई गेदी इक मुहिम दा रूप देई दित्ता।

<><><><><><>

Javed Rana

जम्मू कश्मीर च जनजातीय समुदाय ते कबायली इलाके दे पूरे पराते ते टिकाऊ विकास गी बढ़ावा देने ते मकसद कन्नै जनजातीय मामलें दे मंत्री जावेद अहमद राणा होरें जम्मू कश्मीर दे सब्बै जिलें आस्सेआ पेश कीती गेदी जनजातीय उप-योजना दी समीक्षा कीती। समीक्षा दरान मंत्री होरें समावेशी विकास दे महत्व उप्पर जोर दित्ता ते मुत्तलका धड़ें गी निर्देश दित्ता जे ओह् इस गल्लै गी जकीनी बनान जे जनजातीय उप-योजना गी खरी चाल्ली तैआर करियै असरदार तरीके कन्नै अमल च आंदा जा। एह्दे पूरे पराते तंत्र पर तक्क रखी जा। एह्दे अलावा मंत्री राणा होरें मैह्कमे गी निर्देश दित्ते जे उप-योजना तैह्त् फंड दे आबंटन लेई नीति आयोग आस्सेआ दित्ते गेदे दिशा निर्देशें दा सख्ती कन्नै पालमा करन। मंत्री होरें इस गल्लै पर जोर देइयै आखेआ जे जनजातीय समुदाय दा विकास, जम्मू कश्मीर सरकार दी प्राथमिकता ऐ।

<><><><><><>

Satish Environment

शिड़क यातायात मंत्री सतीश शर्मा होरें आखेआ जे पर्यावरण दी राखी करना मनुक्ख जाति लेई इक विकल्प गैह् नेई, सगुआं अत्तलाजमी ऐ ते असेंगी लोड़चदा जे अस अस पर्यावरण दा संतुलन बनाई रखने लेई ते एह्दे थमां टिकाऊ विकास लेई सब्बै जरूरी जतन करन। मंत्री होरें एह् गल्ल कल पर्यावरण सरबंधी कुल संसारी ध्याड़े दे मौके पर रोड ट्रांसपोर्टेशन कारपोरेशन परिसर जम्मू च अपने संबोधन च आक्खी।

मंत्री होरें दुनिया भरै च पर्यावरण सरबंधी पेश ओने आली चुनौतिएं पर लोह पाई ते आखेआ जे पर्यावरण दी राक्खी करना साढ़ी सब्बने दी सांझी जिम्मेदारी ऐ।

<><><><><><>

Op Shiva

जम्मू-कश्मीर च सुरक्षाबलें 3 जुलाई थमां शुरू होआ करदी 38एं दिनें दी अमरनाथ यात्रा च श्रद्धालुएं दी सुरक्षा लेई ऑपरेशन शिवा दी शुरूआत कीती ऐ। हाल दे पैहलगाम आतंकी हमले गी दिक्खदे होई सेना नै केंद्री सशस्त्र बलें दे कन्नै मिलिये एह शुरूआत कीती ऐ। एह्दे तैह्त्त 42 ज्हार सुरक्षाकर्मी पैहलगाम ते बालतल जात्तरा मार्ग पर तैनात कीते जाडन। उच्च स्तरी सुरक्षा तकनीक सने ड्रोन, सीसीटीवी कैमरे ते त्र'उं घेरें आहली सुरक्षा जकीनी बनाने लेई बुलेट प्रूफ गड्डियें दा बी इस्तेमाल कीता जाह्ग। कुसै बी खतरे गी नाकाम करने लेई जात्तरा मार्गे पर तगड़ी जांच कीती जा'रदी ऐ। ऑपरेशन शिवा दे तैह्त्त श्रद्धालुएं गी बेह्तर इलाज-मुआलजा, ट्रांसपोर्ट ते रिहायश सरबंधी सुविधां मिलडन। गृह मंत्री अमित शाह होरें पिच्छले म्हीने दी 29 तरीक गी जम्मू च इक उच्ची सतह दी समीक्षा बैठक च निर्विघ्न ते सुरक्षित जात्तरा जकीनी बनाने दी सरकार दी वचनबद्धता दोहराई ही। श्री अमरनाथ श्राइन बोर्ड नै सुरक्षा ते निगरानी बधाने लेई लाजमी रेडियो फ्रीक्वेन्सी आहले शिनाख्ती कार्ड बी जारी कीते न।

<><><><><><>

Viksit Krishi

जम्मू दे राई-बाई मैह्कमे दे निदेशक डॉ. अरविंदर सिंह रीन होरें सांबा जिले दा व्यापक दौरा लाइयै उत्थें इसलै चला'रदे विकसित कृषि संकल्प अभियान तैह्त्त जारी गतिविधिएं दी समीक्षा कीती। इस मौके पर दियानी ग्रां च इक गल्लबात आले सत्र दा आयोजन कीता गेआ जेह्दे च साईंसदानें, करसानें, नोजवानें ते खास करियै महिला करसानें बड़ी बद्ध गिनतरी च हिस्सा लैता।

<><><><><><>